

Media Title : Utusan Borneo Sarawak
Headline : RM900,000 lesap, pesara di Miri jadi mangsa sindiket'phone scam'
Date : 25 February 2024
Section : Tempatan
Page : 1



RM900,000 lesap, pesara di Miri jadi mangsa sindiket 'phone scam'

MIRI: Seorang wanita warga emas di sini mengalami kerugian berjumlah RM900,000 selepas diperdaya sindiket penipuan panggilan telefon atau 'phone scam' yang menyamar sebagai pegawai polis.



MANCHA

Pesuruhjaya Polis Sarawak Dato Mancha Ata berkata, laporan daripada mangsa berusia awal 70-an yang merupakan pesara swasta itu diterima pada Khamis.

"Menurut mangsa, beliau telah menerima panggilan telefon daripada nombor yang tidak dikenali dan memperkenalkan diri sebagai pegawai polis dari IPK (Ibu Pejabat Polis Kontinjen) Pulau Pinang.

"Mangsa dimaklumkan telah menyertai satu kumpulan pengubahan wang haram.

"Bagi mengelakkan mangsa ditangkap dan untuk membersihkan nama, mangsa telah diarahkan untuk membuat pembayaran bagi tujuan siasatan dan wang tersebut akan dikembalikan semula," katanya dalam satu kenyataan media.

Mancha menjelaskan, pada pertengahan Januari hingga Februari ini, mangsa telah memindahkan wang menerusi 117 transaksi ke 21 akaun bank yang berbeza.

"Setelah mangsa buat kesemua bayaran tersebut, mangsa menyedari yang dirinya telah ditipu setelah membuat semakan selanjutnya di balai polis berhampiran dan dimaklumkan bahawa panggilan tersebut bukannya daripada pihak polis.

"Jumlah kerugian mangsa adalah sebanyak lebih kurang RM900,000," ujarnya.

✦ [Lihat Muka 2](#)

RM900,000 lesap, pesara di Miri jadi mangsa sindiket 'phone scam'

► Dari Muka 1

Oleh itu, Mancha menasihati orang ramai agar tidak melayani panggilan telefon yang tidak dikenali dan tidak mudah panik atau cemas serta takut dengan sebarang dakwaan yang dibuat ke atas diri sendiri jika tidak melakukan apa-apa kesalahan.

Katanya, orang ramai boleh menghubungi Pusat Respons Scam Kebangsaan (NSRC) di talian 997 jika anda merupakan mangsa penipuan siber seperti 'phone scam', 'love scam', e-dagang, pinjaman tidak wujud dan sebagainya, sekiranya anda baharu sahaja

membuat transaksi pemin-dahan wang ke mana-mana akaun bank atau e-dompot suspek.

Orang ramai turut disarankan untuk memuat turun aplikasi Whoscall melalui Google Play atau App Store untuk membantu anda membuat keputusan sama ada mahu menjawab panggilan telefon yang diterima atau sebaliknya.

"Kerjasama di antara JSJK (Jabatan Siasatan Jenayah Komersial) PDRM (Polis Diraja Malaysia) dengan pembangun aplikasi Whoscall membolehkan nombor telefon yang tersenarai dalam

pangkalan data sistem Semak Mule JSJK akan ditandakan sebagai scammer oleh Whoscall," jelasnya.

Selain itu, beliau berkata orang ramai juga boleh membuat semakan nombor telefon dan akaun bank suspek melalui aplikasi Check Scammer CCID atau laman web <https://semakmule.rmp.gov.my/> sebelum membuat sebarang transaksi kewangan.

Layari akaun rasmi media sosial JSJK @JSJKPDRM dan @CyberCrimeAlertRMP melalui Facebook, Instagram dan Tiktok untuk mendapatkan maklumat modus operandi terkini penipuan.